

**Naaja Nathanielsen
Attaviitsoq**

**UPA 2016/109
18. april 2016**

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allangortinneqarneranik Inatsisartut inatsisaat nr. xx.xx 2016. (Isumaginninnermi malittarisassanik kommunit aqutsinerannik atorunnaarsitsineq)
(Ilaqutariinnermut, Naligiissitaanermut Isumaginninnermullu Naalakkersuisoq)

Una oqaluserivarput pisortaninngaanniit sumiginnaasoqartarnikummat sumiginnaasoqartarmallu. Namminersorerullutik Oqartussaniit nakkutilliinertigut paasineqarpoq kommunit suliassanik naammassinnissinnaanngitsut. Tamassuma kingunerisaanik, meeqqat eqqugaasut ikiortariaqavissut, timikkut tarnikkullu aaqqinneqarsinnaanngitsumik innarlerneqarput. Ajornartorsiut nutaajungilaq. Ukiorpassuarni tusartuarterparput. Tusartuarterparput sumiginnaasoqarnerani nalunaarutiginnittoqaraangat, qisuariartoqartanngitsoq. Inatsisartuni arlaleriarluta oqallisigisarpavut, nunatsinni isumaginninnermik siunnersortit, sulinerminni artukkerneqarnerat sulinerminnilu atugarisaat. Taamaattumik tupaallaassutissaqanngilagut, pisortaninngaanniit sumiginnaasoqarmat maani kipiffeqanngitsumik oqalunnitsinni. Massakkut atukkanut akisussaaqataavugut. Kommunit inunnik isumaginninnermi ingerlatsinissaminnut pisinnaatitaaffiannik unitsitsisinnaaneq, kommunillu sulisuinik sulianut toqqagaasunut tiguisinnaaneq maanna Naalakkersuisut siunnersuutigivaat. Paasisinnaavakka Naalakkersuisut utaqqikatallutik pakatsisimaarnerat. Tamatta taamak misigigunarpugut. Aamma paasisinnaavara soq Nalakkersuisut inatsisissamik siunnersuusiornissaq pisariaqartutut isigisimaneeraat. Taamakkaluarterli qulakkeertariaqarparput inatsisip piviusunik pitsannguuteqarnissaa. Inatsisissamik akuersaassanngilagut iliuseqarsinnaanermik taamaallaat isikkoqartitsissumik ajornartorsiummilli aaqqiinngitsumik. Takujuminaatsippara suliani aalajangersimasuni kommunini sulisunik piffissaligaasumik Naalakkersuisut tiguisinerat qanoq iluaqutaassanersoq. Suliassammi naammassineqartussat taamaaliornikkut ikilnavianngilallat. Nunatsinnilu isumaginninnikkut ajornartorsiutaasut aamma ikilnavianngillat. Taamaattumk pingaaruteqarpoq nunatsinni sulisunik pisariaqartitsineq eqqartussallugu. Inatsisartut aningaasanut inatsisissaannut isumaqatiginninniarnermi Naalakkersuisut itigartitsissutigivaat isumaginninnermik siunnersortsit suliassaannik amerlanerpaaffiliinissaq. Nalakkersuisut tunngavilersuutigivaat suliassanik amerlanerpaaffiliinissap amerlanerusunik pisariaqartitsilerneq ammassammassuk - aamma Naalakkersuisut isumaqarput amerlassutsimikkut naammattunik isumaginninnermik siunnersortsinik atorfinitsitsisoqarsinnaanaviannngitsoq, nutaanik atorfinitsissisoqarusussagaluarpas. Naalakkersuisulli misissuisoqarnissaa neriorsuutiginiuuat. Killiffiit sumiiffiiniq ullumi ilisarimasaaqalernissara qilanaaraara. Paasinnittaasera naapertorlugu sammisatsinni sulisut naammattut aatsaat sullissisorilerutsigit ilorraap tungaanut aallassaagut. Ajornartorsiutaasoq qaangerneqarsinnaanngilaq pikkorissaanikkut ilinniaqqinnikkullu. Sulisoqarnermi sulisut amerlanerit pisariaqartippavut. Nunatsinni isumaginninnermik siunnersortit, tarnip pissusaanik ilinniarsimasut, meeqgerisut, ilinniartitsisut, perorsaasut, nakorsat assigisaallu suliaqareerput naammareeqisunik. Apeqqutaanngilaq pisortaarfik una imaluunniit pisortaarfik alla akisussaasutut inissisimappat. Apeqqutaasoq tassaavoq suliaminnut angummassinnaanngimmata. Amerlanerusunik suleqateqarnissaq innersuussiffissaqarnerlu pisariaqartinneqarput. Siunnersuut ataatsimiititaliamut innersuuppara kaammattuutigalugulu atatsimiititaliap misissussagaa siunnersuutigineqartup ajornartorsiummik aaqqiiffigineraa imaluunniit suli perusissanik allanik pisariaqartitsisoqarnerasoq. Isumaga tassaavoq suliniutigisanik inatsisiliornerillu arlallit pisariaqartinneqartut - isumaginninnermi ajorsarnermi aaqqissutissatut isigineqarsinnaasoq, sivisunerusumik ingerlasumik sukumiilluinnartumik angisuumillu sullniummik ingerlatsineq. Imaassinnaavoq una siunnersuutigineqartoq perusissat arlallit ilagisinnaagaat, taakkulu piffissalikkami ingerlanneqassasut, tamassumalu kingorna nalilersorneqassasut. Ataatsimiititaliaq sulilluaqqunarpoq.